

小謨觴館詩文集注

小坡館詩文集

小謨觴館詩集注卷第二

錢唐孫

元培

長熙

纂輯

南鴻集

丁未迄庚戌

乾隆丁未季秋之月家君以病解職侍籃輿南下
入雁門循太原而東越兗徐之郊至公路浦汎淮
涉江以抵吳會馬背船脣不無所觸凡得詩若干
首嗣里居孤寂所作綦渺不復別編都爲一卷夫
鴻以北爲家及秋南征爲賓予少長塞垣其視歸
也轉若賓焉題曰南鴻取喻且志候也乾隆庚戌
元月中澣甘亭居士書於新溪小築

晉書陶潛傳王宏問其所乘答曰素有腳疾向乘
籃輿亦足自反乃令一門生二兒共轡之 水經
注淮水右岸即淮陰也有公路浦昔袁術
向九江將東奔袁譚路出斯浦因以為名

出東城 丁未

身侍籃輿去心隨馬首東儘拚將傲骨從此犯秋風塢
壁旗翻路雕梁脊倚空母多勞祖帳鴉背夕陽紅

馬首東見左襄十四年傳 後漢書樊準傳修理塢
壁威名大行 杜審言送崔融詩祖帳連河闕軍麾
動洛城 溫庭筠春日野行
詩蝶翎朝粉盡鴉背夕陽多

簪笏

簪笏非親意操刀試一官政寬宜地瘠心古耐山寒去
矣成初服歸歎愜考槃何人傳五柳吾願作雍端

操刀見左襄三十一年傳 離騷經退將復修吾初服 昭明太子陶淵明傳嘗著五柳先生傳以自況又淵明責子詩雍端年十三不識六與七

陽方口

三號雞跢旦落月下長城畫角重關戍清霜萬竈營星懸沙磧大泉瀉石槽清此後西風裏誰來弔北平

史記歷書雞三號卒明 跢旦見周官雞人 史記李廣傳爲右北平太守匈奴號曰漢之飛將軍

途次呈家大人二首

臥擁黃紬被十年阜雕風裏著歸鞭永辭牘尾棲鴉判去覓吳頭放鴨船吏事任人談甲令邊才曾笑案丁零只愁尙有臨歧淚一路山民拜馬前

文彥博知榆次縣詩黃紬被裏曉眠熟放出頭來道放衙

陸游詩判餘牘尾棲鴉濕

朱子詩春回楚

尾吳頭

陸游詩借得南鄰放鴨船

漢書宣帝紀

注如淳曰今有先後故漢書有令甲令乙令丙若今

之第一第二第三篇也

後漢書孔融傳操討烏桓

嘲之曰大將軍遠征蕭條海外昔肅慎不貢楮矢丁

零盜蘇武牛羊可并

案也案零憐古音通

半馱書卷半裝衣無限山光落畫旗白草曉隨馴野雉

黃河宵逐聽冰狸久看漠北安屯牧不用淮西狀事宜

閣道鞅韡眞失策苦緣刺促悞歸期

後漢書魯恭傳拜中牟令河南尹袁安使仁恕掾肥親往廉之有雉過止其傍傍有童兒親曰兒何不捕之兒言雉方將雛親瞿然起曰所以來者欲察君之政跡耳今蟲不犯境一異也化及鳥獸二異也豎子有仁心三異也久留徒擾賢者耳

埤雅廣要狐性好疑渡冰輒聽狸亦有之韓愈集有論淮西事宜

狀 王隱晉書山濤領吏部潘岳內非之作謠曰
閣道東有大牛王濟鞅裴楷鞅和嶠刺促不得休

廣武 漢械繫婁敬處非河南之廣武山也

磴道層層轉風煙漠漠愁厓傾寒日隱山豁斷雲流

虜名何羨韓王骨孰收悲懷同阮籍揮淚過邊州

史記劉敬傳上怒罵曰齊虜以口舌得官今乃妄言

沮吾軍 晉書阮籍傳嘗登廣武觀楚漢戰處嘆曰

時無英雄使豎子成名

案廣武山也具題下

崞縣酒間作

投紱悲生事持廉感病親車看壓裝薄僮諒在官貧有

疣琴畱橐無糧鶴舁人崞山殘雪路捫酒莫辭頻

潘岳閒居賦髦士投紱 史記優孟傳廉吏安可爲

也楚相孫叔敖持廉至死方今妻子窮困負薪而食

漢書禮樂志給大官桐馬酒
注以馬乳爲酒撞桐乃成也

入雁門關二首

陟嶺山形變軒然起大波谷深容雪厚峰斷得天多馬
怯鷹窠峻人衝虎穴過上關重頻首落日下滹沱

韓愈詩軒然大波起高啟詩東望鷹窠峰中天
插孤青後漢書班超傳不入虎穴不得虎子

寥落赫連營蒼茫李牧城風雲三晉氣車馬半天聲延
鷺看新堠椎牛問老兵萬山愁立馬吾愧棄繻生

山西通志赫連營李牧城俱代州地楊慎詩山遮
延鷺堠江繞畫烏亭案魏書官氏志以伺察者爲候
官取其延頸遠望也史記馮唐傳魏尚爲雲中守
五日一椎牛饗賓客軍吏舍人棄繻生見漢書終

軍傳

李晉王墓下作

三峰飄泊悲殘唐齊雲樓上歌淒涼誰援十八葉天子
朱耶糸出金娑陽赤馬將軍賜屬籍黑鴉突騎威戎羌
渭橋轉戰果頭滅論功第一加平章霸才往往遭忌嫉
礪山賊子東平王表誅山南稱亂首無乃有意相參商
東遷奇變起椒殿三百世禩歸大梁雄心莫遂渡河志
坐使木子成天亡我來下馬拜殘冢豐碑剝蝕龜趺僵
義兒子將盡安在楸梧松櫨森成行當年破賊過上黨
還軍置酒三垂岡綠衣奏曲感衰老樽前涕泗流沲滂
一笑風雲爲變色奇兒帳下排銀槍獬獬磨牙競竊國

赤心家世眞堂堂英雄獨推獨眼獨豈得例彼邠岐梁
柏林寺旁亂沙草射鳬川口霏煙霜西風蓬蓬墓門轉
雁山日瘦天蒼黃靈光浩魄自來去長與兵氣同飛揚
計敏夫唐詩紀事乾寧三年李茂貞犯關帝次華州
韓建迎歸郡中帝鬱鬱不樂常登城西齊雲樓遠望
製菩薩蠻二首云飄飄且在三峰下秋風往往堪霑
灑唐書宦者傳楊復光頗以節誼自奮監忠武軍
周岌受賊命復光泣曰公奮匹夫封侯乃背十八葉
天子北面臣賊何恩義利害昧昧耶五代史唐本
紀其先本號朱耶其後別號沙陀而以朱耶爲姓
唐書沙陀傳處月居金娑之陽又大中初吐蕃寇河
西沙陀赤心所向虜輒披靡曰吾見赤馬將軍火生
頭上五代史唐本紀執宜死其子曰赤心討龐勛
於徐州以功賜姓名李國昌以之屬籍子克用少驍
勇號曰李鴉兒其一目眇及其貴也又號獨眼龍黃
巢陷京師諸鎮兵皆會長安大戰渭橋賊敗走京師
平克用功第一拜檢校司空同中書門下平章事

錢希白南部新書黃巢令皮日休作讖云欲知聖人名果頭三屈律巢頭醜疑其讖遂及禍五代史梁本紀太祖姓朱氏宋州碭山午溝里人龍紀元年封東平王賂張濬請伐河東資治通鑑天祐元年梁王全忠弒帝於椒殿五代史義兒傳存孝本姓安名敬思賜姓名以爲子常從爲騎將五代史唐本紀克用破孟方立還軍上黨置酒三垂岡伶人奏百年歌坐上皆悽愴時存勗在側方五歲克用慨然曰吾行老矣此奇兒也後二十年其能代我戰於此乎天祐五年卽王位十二年入魏州以其兵自衛號帳前銀槍軍邠謂王行瑜岐謂李茂貞梁朱全忠俱詳唐書及通鑑代州志柏林寺州西晉王墓側後唐同光中建五代史唐本紀同光三年射鵬於郭泊

代州

斥堠笄山路鞭絲鉞墜秋寒泉嘗豹突神水問羊頭塞

迴榆陰直霜嚴馬色愁憑誰話鉤黨一訪吉祥樓

明熹宗時

趙南星謫成代州所

居小樓顏曰吉祥

代州志磨笄石在夏屋

趙襄子誘殺代王其姊爲代

王夫人磨笄自殺

水經注陘山南北有長嶺嶺上

東西有通道卽餅陘也

山西通志豹突泉代州北

三十里羊頭神河有二一源茹解都黑龍池一源茹

解都黃

龍池

漢雁門太守郅都墓歌

蓬顆纍纍蔽杯土
酷吏雄威昔如虎
儻宗三百不敢肆
十郡畏之如大府
持節防邊雁門守
六角十箭聞風走
偶人不中中漢法
終使蒼鷹遙授首
嗚呼民樸畏罪班
史書獨先嚴酷胡
爲歟遺墟過者尙
側目轉想網漏吞
舟魚救火揚沸理
不常豈但坐殺臨
江王不聞同時桐

鄉葬朱邑至今遺民猶雨泣

漢書賈山傳使其後世曾不得蓬顆蔽冢而託葬焉
漢書酷吏郅都傳濟南閭氏宗人三百餘家豪猾
景帝拜都濟南守至則誅閭氏首惡餘皆股栗旁十
餘郡畏都如大府都遷中尉臨江王徵詣中尉府對
簿欲得刀筆爲書謝上都禁弗與魏其侯使人間與
臨江王爲書謝上因自殺爲雁門太守匈奴爲引兵
去至爲偶人象都令騎馳射莫能中其見憚如此匈奴患之乃中都以前注者不復再出亦不云見某卷
獨非忠臣乎於是斬都也 六角見卷一馬邑道中
詩注以下凡已見前注者不復再出亦不云見某卷
某注以省繁文 舊唐書突厥傳每部令一人統之
號爲十設每設賜一箭故稱十箭 漢書郅都傳是
時民樸畏罪自重而都獨先嚴酷 漢書酷吏傳序
漢興破觚而爲圜斲珣而爲樸號爲罔漏吞舟之魚
又吏治若救火揚沸非武健嚴酷惡能勝其任而媮
快乎 漢書循吏傳朱邑且死屬其子曰我故爲桐
鄉吏其民愛我必葬我桐鄉後
世子孫奉嘗我不如桐鄉民

元遺山墓

野史亭荒宿草橫芳華載酒想平生燕南趙北關河淚
大定明昌廟社情壯閱滄桑悲杜宇老傳詞賦況蘭成
青山一片吟魂逝愁說烽煙上蔡城

金史元德明傳子好問晚年尤以著作自任以金源
氏有天下典章法度幾及漢唐國亡史作已所當任
乃構亭於家著述其上名曰野史元好問西園詩
畫船載酒芳華遊後漢書公孫瓚傳燕南垂趙北
際元好問詩燕南趙北無全上王後盧前總故人
元好問甲午除夜詩神功聖德三千牘大定明昌
五百年元好問詩花啼杜宇歸來血樹挂蒼龍脫
後鱗元好問俳體詩白髮纍臣幾人在就中愁煞
庾蘭成又時上高層望宋州
案金亡於蔡州古上蔡地

續有作

三唐以後論詩法滄海橫流派別分秋兔有豪誰盡力
長鯨能掣定推君銅槃鉛水愁中雨壁月瓊枝夢裏雲
留得蘇孃錦機在百番低首讀回文

元好問論詩詩只知詩到蘇黃盡滄海橫流卻是誰
元好問野史亭感興詩秋兔一寸豪盡力不易舉
杜甫巖爲六絕句或看翡翠蘭若上未掣鯨魚碧海
中元好問西園詩銅人攜出露盤來人生無情淚
沾臆又壁月瓊枝春色裏畫闌桂樹雨聲中元
好問自題千秋萬古迴文錦只許蘇娘讀得成

道上見驅驢者被以錦韉寶轡感賦二首

關山雨雪晝淒淒方麴何人走大隄轉眼風前有衰盛
翻教肥馬不成嘶

白居易傷友詩蹇驢
避路立肥馬當風嘶

一樣金珂耀絡繆弄風得意自長鳴誇他令僕人才好

忘卻麒麟地上行

南史劉祥傳於朝士多所貶忽王奐爲尚書僕射祥見路人驅驢祥曰驢汝好爲之如汝人才皆已令僕

杜甫驄馬行近聞下詔

啗都邑肯使麒麟地上行

寄題故明孫白谷尚書郊園

尚書邸第近城闔老屋當年綽楔新龍漢已更浮世劫
鶯花猶爲故侯春蒼黃殘卒哀庚癸惻愴斜陽話甲申
卻指秦雲通雁塞函關西望一傷神

案明兵部尚書孫傳庭代州人有園址在城外張君房雲笈七籤過去有劫名曰龍漢龍漢一選經九萬九千九百九十九劫氣運終極庚癸見左氏哀十三年傳蓋指柿園兵敗事

忻口晚行

脂車陟元冬慘瘳日在尾隄危路爭猱嶺陡馬緣螳獍
飈卷孤芽勢若走虵虺老楓作人形返照發光煒漢賊
談王黃孺子笑陳稀區區一代相弄兵犯不韙誰家孤
冢破髑髏出榛卉行人撻蓬指得無兵死鬼往劫何陳
因阨塞天變黦夕烽舉邊樓浩歌爲歔歔

蘇軾海會寺詩綫路每與猿狖爭釋惠洪詩落日
人如凍螳行韓愈詩猛颯攬空衢王質良嶽賦
極驚虵而走虺譚子化書老楓化爲羽人漢書
高祖紀代相國陳豨反王黃將騎千餘軍曲逆
子天瑞篇
撻蓬而指

野店